

Leiðbeiningar vegna umsóknar um vilyrði fyrir endurgreiðslu

Lögum um endurgreiðslur er ætlað að stuðla að því að viðkomandi framleiðsla sé til þess fallin að koma íslenski menningu á framfæri, kynna sögu lands og náttúru eða auki reynslu, þekkingu og listrænan metnað þeirra sem að framleiðslunni standa.

Umsækjendum er bent á að kynna sér vel lög nr. 43/1999 og reglugerð nr. 450/2017 um endurgreiðslur vegna kvikmyndagerðar áður en sótt er um vilyrði. Umsókn skal skilað áður en framleiðsla verks hefst á Íslandi.

Athygli er einnig vakinn á því að skv. 5. gr. laga um endurgreiðslur skal umsókn um útborgun endurgreiðslu berast innan sex mánaða frá lokum framleiðslu. Lok framleiðslu teljast vera í síðasta lagi við frumsýningu. Þegar um framleiðslu þáttaraðar er að ræða teljast lok framleiðslu vera við frumsýningu síðasta þáttar í stakri þáttaröð.

Umsóknarferli

Umsókn um vilyrði skal send í gegnum [rafræna umsóknargátt](#) sem finna má á heimasíðu Kvikmyndamiðstöðvar Íslands. Þegar umsókn um útborgun hefur verið skilað er móttaka hennar staðfest með tölvupósti. Ef óskað er eftir frekari gögnum áður en umsókn er tekin til efnislegrar meðferðar, fær umsækjandi tilkynningu um það í tölvupósti. Nefnd, skipuð af ráðherra málaflokksins, fer yfir allar umsóknir og metur hvort þær uppfylla skilyrði ofangreindra laga og reglugerðar. Nefndin fundar að jafnaði á tveggja vikna fresti, en fullnægjandi umsóknargögn skulu liggja fyrir eigi síðar en fimm virkum dögum fyrir fund.

Gögn sem óskað er eftir

Vottorð úr fyrirtækjaskrá

Senda þarf vottorð úr fyrirtækjaskrá sem staðfestir hver er framkvæmdastjóri félags og hverjir eru í stjórn. Hægt er að nálgast slíkt yfirlit gjaldfrjálst á heimasíðu [fyrirtækjaskrár Ríkisskattstjóra](#):

Handrit

Fullbúið handrit skal fylgja umsókn.

Verkefnamat

Verkefnamati er ætlað að vera mælikvarði á það hvort viðkomandi framleiðsla uppfylli skilyrði laga um endurgreiðslur.

Verkefnamatið skiptist í tvo hluta: 1) Menningarhluta og 2) Framleiðsluhluta.

Stig eru gefin fyrir hvert viðmið og skilyrði er að verkefni nái að lágmarki 23 stigum í samtals og 4 stigum fyrir menningarhluta verksins.

Við útfyllingu verkefnamats skal umsækjandi færa skýr rök fyrir því hvernig verkið uppfyllir viðmiðin.

Hér má finna tengil á eyðublað fyrir [verkefnamat](#) sem vistað skal sem Word skjal og sent með umsókninni. Umsækjendum er jafnframt bent á að kynna sér vel [skýringar á stigagiðfinni](#) áður en verkefnamatið er fyllt út.

Staðfesting á dreifingu

Það er forsenda endurgreiðslu að verkið sé ætlað til almennra sýninga. Með umsókn um vilyrði skal því fylgja staðfesting og upplýsingar um hvar og hvernig verkið verður sýnt opinberlega.

Sérstök athygli er vakin á því að eftirfarandi efni uppfyllir ekki skilyrði laga um endurgreiðslur vegna kvikmyndagerðar: auglýsinga- og fréttatengt efni, stuttmyndir, upptökur af íþróttaviðburðum og skemmtunum, efni sem fyrst og fremst er ætlað til kynningar á tiltekinni vöru eða þjónustu, svo og efni sem fyrst og fremst er ætlað til sýninga í eigin dreifikerfi.

Greinargerð um að verkefnið falli að markmiði laga

Umsækjandi skal færa rök fyrir því að verkið falli að markmiðum laga nr. 43/1999 um eflingu innlendra menningar og kynningu á sögu landsins og náttúru.

Kostnaðaráætlun og útreikningar á stofni til endurgreiðslu

Áður en útreikningar á stofni til endurgreiðslu eru lagðir fram, skal umsækjandi kynna sér vel kynna sér vel 5. gr. a laga um endurgreiðslur: *Framleiðslukostnaður sem myndar stofn til endurgreiðslu.*

Heildarframleiðslukostnaður vísar til alls kostnaðar sem fellur til við framleiðslu kvikmyndar eða sjónvarpsefnis, óháð því hvar verkþættirnir eru unnir. Þetta felur í sér kostnað sem fellur til á Íslandi, innan EES-svæðisins, og í öðrum löndum utan EES.

Með umsókn skal leggja fram kostnaðaráætlun á Excel eða PDF formi sem sýnir þann kostnað sem fellur til á Íslandi og,

eftir atvikum, í öðrum ríkjum EES svæðisins. Ef eingöngu er sótt um endurgreiðslu vegna kostnaðar sem greiddur er til aðila sem skattskyldir eru á Íslandi er ekki nauðsynlegt að senda kostnaðaráætlun fyrir heildaframleiðslu verks, aðeins þeim verkliðum sem sótt er um endurgreiðslu fyrir.

Ítrekað er að eingöngu kostnaður sem greiddur er af umsækjanda myndar stofn til endurgreiðslu. Þetta á einnig við um kostnað sem fellur til innan EES, utan Íslands.

Einungis sá kostnaður sem fellur til á Íslandi og uppfyllir þau skilyrði sem talin eru upp í 5. gr. a laga um endurgreiðslur telst tækur til endurgreiðslu. Þó er bent á að hafi meira en 80% af heildaframleiðslukostnaði verksins fallið til á Íslandi er einnig heimilt að reikna endurgreiðslu af þeim kostnaði sem féll til innan EES, auk Grænlands og Færeyja. Bent er á að samkvæmt lögum um endurgreiðslur teljast laun og verktakagreiðslur eingöngu mynda stofn til endurgreiðslu séu þau sannanlega skattlögð á Íslandi. Ef kostnaðaráætlun verkefnis inniheldur kostnað vegna verktaka eða launþega sem skattskyldir eru innan EES, utan Íslands, skal sá kostnaður ávallt dreginn frá í útreikningi á stofni til endurgreiðslu.

Sérstök athygli umsækjenda er vakin á því að ekki fæst endurgreiðsla vegna kostnaðar sem ekki hefur verið sannanlega greiddur þegar framleiðslu lýkur og sótt er um útborgun. Þetta getur meðal annars átt við um víkjandi þóknarir, fastan stjórnunarkostnað framleiðslufyrirtækis og áætlaðan framtíðarkostnað.

Ef stofnað er sérstakt fyrirtæki (SPV / dótturfélag) utan um framleiðslu verkefnis telst óbeinn stjórnunarkostnaður, hlutdeild í rekstrarkostnaði eða framlag framleiðanda, sem metinn er sem hlutfall af veltu móðurfélags ekki vera hluti af stofni til endurgreiðslu, sbr. d. lið í 5. gr. a laga um endurgreiðslur.

Ef ekki er stofnað SPV utan um framleiðsluna skal kostnaður sem skráður er á verkefnið vegna mögulegs óbeins framlags eða hlutdeildar framleiðslufélags í kostnaði verkefnis (óbeinn stjórnunarkostnaður) byggja á mati á hlutdeild verkefnisins í starfseminni og taka mið af notkun tiltekinna aðfanga, búnaðar, aðstöðu eða vinnuframlags. Verðlagning þeirra aðfanga skal taka mið af kostnaðarverði í samræmi við þann kostnað sem notaður er við skráningu þeirra í fjárhagsbókhald. Forsendur útreikninga skulu vera skýrar og byggja á eðlilegum sjónarmiðum. Umsækjandi skal jafnframt skila afriti af hreyfingalista framleiðslufyrirtækisins sem staðfestir þann kostnað sem útreikningarnir byggja á.

Öll opinber innlend framlög, þar með talið styrkir frá Kvikmyndamiðstöð Íslands, dragast frá stofni til endurgreiðslu. Þetta á við öll opinber fjárfraðslög sem staðfest eru óháð því hvort þau hafi verið greidd út að fullu þegar sótt er um útborgun endurgreiðslu.

35% endurgreiðsla

Til þess að njóta 35% endurgreiðslu þarf verkefni að uppfylla eftirfarandi þrjú skilyrði:

1. **Endurgreiðsluhæfur kostnaður** vegna framleiðslu á Íslandi skal nema að lágmarki 350 milljónum króna.
2. **Tökudagar** (e. principal photography) á Íslandi skulu vera að lágmarki 10, og samanlagður fjöldi tökudaga og eftirvinnsludaga á Íslandi að lágmarki 30.
3. **Fjöldi starfsmanna** sem vinna með beinum hætti að framleiðslunni á Íslandi skal vera að lágmarki 50. Þeir einstaklingar skulu vera skattskyldir á Íslandi og vinna að framleiðslunni í a.m.k. einn heilan dag hver, sem launþegar eða verktakar.

Fjármögnunaráætlun

Óskað er eftir sundurliðun í töfluformi (Excel eða PDF) sem sýnir alla fjármögnunarliði og stöðu hvers liðs. Heildarsumma fjármögnunarliða skal stemma við kostnaðaráætlun.

Samningar eða vilyrði vegna staðfestrar fjármögnunar skulu fylgja með umsókn. Umsækjendum er bent á að þegar sótt er um útborgun endurgreiðslu skal öll fjármögnun staðfest.

Aðrar upplýsingar

Upplýsingar sem óskað er eftir um útgjöld eftir landshlutum og atvinnusköpun eftir kyni eru eingöngu notaðar til greiningar. Þessar upplýsingar hafa ekki áhrif á ákvörðun um styrkveitingu, heldur eru þær nýttar til að meta samfélagsleg áhrif endurgreiðslukerfisins.
